

四庫全書

集部

# 欽定四庫全書

集部

御定歷代賦彙外集卷七

詳校官檢討臣劉 炘

主事銜臣徐以坤覆勘

總校官編修臣王燕緒

校對官中書臣王慶長

謄錄監生臣龔際美

欽定四庫全書

御定歷代賦彙外集卷七

懷思

懷思賦

晉  
夏侯惇

何天地之悠長悼人生之短淺思縱欲以求歡苟抑沉  
以避免嗟聖王之制作所以貴夫善善信循道以從法  
何世路之遶蹇始潔操以迄今每適道而靡違思典言  
以攝事弗履過而循非恒戰戰以兢慄杜穢釁而防微

金少已公全集 卷七  
斂規節以踐跡冀天鑒之佑誠勤恭肅以端厲常苦心  
而勞形桑榆淹其薄沒既白首而無成世務多故吾固  
甘夫無為名不足以為尚空勞穢以自卑永無事以安  
神幸歿世之無知

懷思賦

晉王氏

劉柔妻

超離親而獨寄與憂憤而長俱雖亮分以自勉曾無間  
乎須臾思遙遙而忉惓疾結滯乎肌膚憶昔日之歡侍  
奉膝下而怡裕集同生而從容常欣泰以逸豫何運遇

之偏否獨遼隔於修路彼恒鳥之將分猶哀鳴以告離  
况遊子之眷慕孰殷思之可靡於是仲秋蕭索萼收西  
御寒露宵零落葉晨布羨歸鴻之提提振輕翼而高舉  
志渺眇而遠馳悲離思而嗚咽彼邁物而推移何予思  
之難泄聊擘翰以寄懷悵辭鄙而增結

幽思賦

魏  
曹植

倚高臺之曲隅處幽僻之間深望翔雲之悠悠羌朝霽  
而夕陰顧秋華而零落感歲暮而傷心觀躍魚於南沼

聆鳴鶴於北林，搦素筆而慷慨。揚大雅之哀吟，仰清風以歎息。寄余思於悲絃，信有心而在遠。重登高以臨川，何余心之煩錯。寧翰墨之能傳。

愁思賦

魏曹植

四節更王兮，秋氣悲遙。思惆恍兮，若有遺原。野蕭條兮，煙無依雲。高氣靜兮，露凝殘野。草變色兮，莖葉稀。鳴蜩抱木兮，鴈南飛。歸室解裳兮，步庭前。月光照懷兮，星依天。居一世兮，芳景遷。松喬難慕兮，誰能僊。長短命也兮。

獨何慙

愁思賦

魏  
繁  
欽

何旻秋之慘悽處聞夜而懷愁潛白日於玄陰翳朗月  
於重幽零雨濛其迅集潢潦汨以橫流聽峻階之回雷  
心沉切以增憂嗟王事之靡盬士感時而情悲願出身  
以徇役式簡書以忘歸時陟岵以旋顧涕漸纓而鮮晞  
聽鳴鶴之哀音知我行之多違悵俯仰而自憐志躑躅  
而摧威聊弦歌以厲志勉奉職於閨闈

述思賦

晉  
陸機

情易感於已攬思難戢於未忘嗟伊思之且爾夫何往  
而弗臧駭中心於同氣分戚貌於異方寒鳥悲而饒音  
衰林愁而寡色嗟余情之屢傷負大悲之無力苟彼塗  
之信險恐此日之行是亮相見之幾何又離居而別域  
觀尺景以傷悲撫寸心而悽惻

行思賦

晉  
陸機

背洛浦之遙遙浮廣川之裔裔遵河曲以悠遠觀通流



之所會啟石門而東縈汾汴渠其如帶託飄風之習習  
冒沉雲之靄靄商秋肅其發節玄雲霈而垂陰涼風淒  
其薄體零雨鬱而下淫覩川禽之遵渚看山鳥之歸林  
揮清波以濯羽藏綠葉而弄音行彌久而情勞途愈近  
而思深羨品物以獨感悲綢繆而在心嗟逝官之永久  
年荏苒而歷茲越河山而託景眇四載而遠期孰歸寧  
之弗樂獨抱感而弗怡

遐思賦

晉鍾氏

王渾妻

唯中秋之慘悽百草萎悴而變衰燕翔逝而歸海蟋蟀  
鳴而相追坐虛堂而無聊嗟我心之多懷悵遐思而內  
結嗟爾姜兮藐不我留諒民生之未幾吾何為其多愁  
涼風蕭條露沾我衣憂來多方慨然我懷感飛鳥之還  
鄉詠衛女之思歸於是周遊客與逍遙彷徨悲民心之  
局曲願輕舉之遐翔

遊思賦

宋鮑昭

雲徑兮海衝上潮兮送風秋水兮駕浦涼煙兮冒虹暮

氣起兮遠岸黑陽精滅兮天際紅波沄沄兮無底山森  
森兮萬重平隰兮亘岸通川兮瀉壑仰盡兮天經俯窮  
兮地絡望波際兮曇曇眺雲間兮灼灼乃江南之斷山  
信海上之飛鶴指煙霞而問鄉窺林嶼而訪泊撫身事  
而識苦念親愛而知樂苦與樂其何言悼人生之長役  
舍堂宇之密親坐江潭而為客對蒹葭之遂黃視零露  
之方白鴻晨驚以響湍泉夜下而鳴石結中洲之雲蘿  
託絲思於遙夕瞻荆吳之遠山望邯鄲之長陌塞風馳

兮邊草飛胡沙起兮鴈揚翩雖燕越之異心在禽鳥而  
同戚悵收情而拭淚遣繁悲而自抑此日中其幾時彼  
月滿而將蝕生無患於不老奚引憂以自逼物因節以  
卷舒道與運而升息賤賣卜以當壚隱我耕而子織誠  
愛秦王之奇勇不願絕筋而稱力已矣哉使豫章生而  
可知夫何異乎叢棘

征思賦

宋 傅亮

逢休明之餘祐託菲薄於末暉既致戎於皇幄亦備官

於牢闔傷鵜梁以載揚詠伐檀而屢思和風翕以首節  
零雨鬱而四垂津雲暖以合體墳衍杳其無封羨歸飛  
之能矯樂湍流之自東想和鑾之北徂企雲旗之西舉  
灑三川之積塵廓二嶠之重阻覲高掌於華陽聆鳴鳳  
於洛浦

離思賦

有序

魏  
曹植

建安十六年大軍西討馬超太子留監國植時從焉意  
有憶戀遂作離思賦云

在肇秋之嘉月將耀師而西旗余抱疾以賓從扶衡軫而不怡慮征期之方至傷無階以告辭念嗣君之光惠庶沒命而不疑欲畢力於旌麾將何心而遠之願我君之自愛為皇朝而寶己水重深而魚悅林修茂而鳥喜

離思賦

晉左九嬪

生蓬戶之側陋兮不閒習於文符不見圖畫之妙像兮不聞先哲之典謨既愚陋而寡識兮謬忝廁於紫廬非草茅之所處兮恒怵惕以憂懼懷思慕之忉怛兮兼始

終之萬慮嗟殷憂之沈積兮獨鬱結而靡訴意慘憤而  
無聊兮思纏綿以增慕夜耿耿而不寐兮魂憧憧而至  
曙風騷騷而四起兮霜皚皚而依庭日曖曖而無光兮  
氣慟慟以烈清懷愁戚之多感兮患涕淚之自零昔伯  
瑜之婉孌兮每綵衣以娛親悼今日之乖隔兮奄與家  
為參辰豈相去之云遠兮曾不盈乎數尋何良集之清  
切兮欲瞻覩而莫因仰行雲之歔歔兮涕流射而沾巾  
惟屈原之哀感兮嗟悲傷於離別彼城闕之作詩兮亦

以日而踰月況骨肉之相違兮永緬邈而兩絕長含哀  
而抱戚兮仰蒼天而泣血亂曰骨肉至親化為他人永  
長辭兮慘愴愁悲夢想魂歸見所思兮驚寤號咷心不  
自聊泣漣泗兮援筆抒情涕淚增零訴斯詩兮

離思賦

有序

明  
魏學洙

乙卯春季家大人北之文安時序如流忽爾感烈離思  
耿耿爰造斯篇情而不文亦聊以自攄也辭曰

憶陽春之恢台兮擘垂楊之青青將余親於江皋兮屯



余行其玲峴數辟呬余類詔兮逝將去此而遐征各懷  
懔其弗繹兮中愴怛而難平陟巉巖以周覽兮覩大江  
之滔滔道曼曼其靡極兮憤礧砢之怒濤恍齊魯之在  
望兮迷颺颺之颺颺萍島汨其浮沒兮衝風動夫布袍  
意徘徊而罷眺兮步徙倚乎彼皋勉商略江山之奇勝  
兮志奄奄其不豪載宿宿以俶裝兮命歸者先解維乘  
潮水之迅駛兮撫中心而不夷願及行之未遠兮更一  
見而致辭計淹留其終別兮強自割而遂馳道晉陵之

殷麟兮踰姑蘇之燬爛出新詩於輕篋兮吟數章而永  
歎涕霏霏其若霰兮神溶溶而無畔馮惆悵以獨返兮  
瘋憂集而惓惓既傷兒之懷親兮重傷親之念兒戒歸  
懼令適發兮還三復而恥之匪無則言以自壯兮寫中  
曲乎兩眉孰有恨而非別兮孰有別而不思佯婆婆其  
媿樂兮各不言而相知羌姜約以自廢兮憐風日之淒  
其既駕檣櫓兮臨迴道之三千歸期勿可道兮行遠縣  
乎歲年肇發棹於吳會兮轄將弛乎幽燕遺女魃之儼

舞兮路迤邐而不前桃李標落以道盡兮榴火歟而復  
然頃艾虎其縈懷兮又聞江南之采蓮跋烏不可與儷  
偕兮草木芸芸其屢遷傷征迹之躑躅兮忽涕泗之流  
凝石圻沸焦煙兮望錢塘而駐旆蹈赤坂之赫威兮蹇  
傍徨以賴跼歔愁愁其若撼兮懷余親而長嘔去衡泌  
之肅冷兮服頑沙之颺璫荃不堪此蘊隆兮矧羈旅之  
狼狽臆怫鬱以繚悵兮恒假寐而獨惴惴忻忻其承顏  
兮或髣髴乎既歸盱余目而莫覲兮羌厭浥其漬幃每

惆悵以竟日兮留夢境而弗違  
鴈翩翩南翔翔兮寄兒  
以新豪憎世路之露晷兮鳴吾鼎之為寶  
鱣鯨裁於螻  
蟻兮虎豹吼而當道鳳凰班於天門兮覽九苞其猶未  
保挾蓬矢其肅心兮徒傷謀生之草草  
兒願及年之方  
將兮懷夜光而粥之薰椒桂與木蘭兮輯翠羽之陸離  
苟善賈其可俟兮將良方以為箕出門邁夫文窮兮羣  
衆兆而見嗤送裘馬於五陵兮什散貂而自私天實構  
此西日之局兮詎賁獲之可為快  
愁約以侘傺兮志違

連其俞亢塊獨處此窮簷兮倚斜陽而四望感嚴威之  
威發兮俄颺涌以跳盪女機杼而士喟兮幸家人之無  
恙曰坎坎其育鞠兮獨有行乎四方俱昕夕而匪所睚  
兮知永懷夫故鄉跂游雲以攬涕兮霑余袂其浪浪辭  
曰人生孰無別離兮恃來者之可期幼不誦夫甫田兮  
曷怛怛其相思

別思賦

明

何景明

君何為兮遵修途以長徂俾予懷之弗怡懣懣愴而罔

憇顧左右而若遺莽川陸之迴薄迴城闕之逶迤山翳  
翳而景入林蒼蒼而鳥稀拂清霜而採松迎夕露而折  
葵托涓忱於微贈諒余志之可追皎秋日以天心指歲  
寒以為期俟行塵之我延臨晨風而褰衣

後別思賦

有序

明  
何景明

伯川將之河西予既為別思賦矣及王舍人文熙館為  
別予以事不得往為之快然乃紆鄙懷為後別思賦  
懷諸彥之雅趣款行客以終宵慨離違之多端接晤語

而逍遙時乃御閒館即別院天列列而疾颺月霏霏而  
微霰開重簾之華燈飛逸翰於清燕締久要而莫渝顧  
暫睽而益眷瞻芳塵之未遐仰光惠而引領恍予神而  
奮馳悵予駕之弗騁覽歲事之遲暮延軒楹之夕景葉  
歷歷以辭秋霜淒淒而凝冷顧征鴻之稍滅戀行雲之  
佇影送夫君以申佩寄一感於茲遊悼霖澤之久愆恐  
江河之不流矧庶役之未蠲固凋弊之所由懲舊途之  
仆軌濟巨川而思舟操吾道而罔屈何令名之不修傾

風譽於咫尺日結睇於河洲

思親賦

晉陸機

悲桑梓之悠曠愧蒸嘗之弗營指南雲以寄歎望歸風而效誠年歲俄其聿暮明星爛而將清迴飈肅以長赴零雪紛其下頽羨纖枝之在幹悼落葉之去枝存顧復之遺志感明發之所懷居辭安而厭苦養引約而推豐忘天命之晚暮願鞠子之速融兄瓊芳而蕙茂弟蘭發而玉暉感瑰姿之晚就痛慈景之先違天步悠長人道



短矣異途同歸無早晚矣

思親賦

明  
王  
禕

仰蒼昊之冥漠運玄化之混淪何賦授之殊致或偏頗而不均撫予身之薄祐慨此生之多屯豈造物之見靳將受命之匪辰歲越在乎稚齡倏棄捐乎嚴君曾志學之未逮已過庭而無聞寄眇眇之弱植托微微之孤根灑血淚於枯栢結哀號於愁雲痛蓼莪之既深幸菽水之可樂調旨甘於滫瀡糝餘粒於藜藿躋積雪而荀生

斷層冰而鱗躍奉慈訓之溫恭承懿範之柔恪雖罔極  
之莫忘固終養之有託急景不息芳年易徂曷致三釜  
曷賁重壚恐令名之不振使先猷之弗舒奉堂上之明  
命離膝下之深娛乃辭故里乃游名區薦紳是從冠蓋  
為徒擣麗藻於淮浙覲清光於皇都朗節矯以遐奮蜚  
聲韡其旁敷嗟功名之蹭蹬慨日月之居諸處違離以  
自適與憂憤而長俱盼丘園之雨寂睠桑梓之雲腴烝  
嘗邀其弗逮溫清俟其久疎豈初服之難返念夙素之

已渝感風樹以浩歎閱燧穀而長吁至若青陽布和綉  
景騰美風揚柔颺日轉華晷雖行樂而何歡恨承顏之  
非適未明啟節南風奏琴果散嘉實樹聯芳陰枕炎蒸  
其孰理襟邑鬱而莫任灑露宵零嚴霜晨被阪遠萎蘭  
隰空推穢鴈哀哀以翔霄葉蕭蕭而墮地怵此日之苦  
思激往年之餘涕玄冥臨御重陰固寒蕭條微塞搖落  
鄉關日韜光而弗耀川積凍而成乾伊天意之猶慘豈  
物情之能歡矧予懷之含瘁固觸景而增酸惟四時之

推移靡一息之停緩年既迫於喜懼日宜較乎長短指  
白雲之在望緬丹丘其未遠遡歸風而效誠藉流月以  
寄款儻微榮之可養固遠遊之焉敢閔干祿以辭親會  
為吏而踰險在往哲其猶然可吾儕之不勉誓至恩之  
少酬期余生之無忝持寸艸之微心報春暉於未晚獮  
設祭以報本烏反哺而效慈彼蠢蠢之細物亦靈明而  
有知察妙理以彌戚曠大觀而遐思悵意長而語短聊  
攄翰以陳詞

孝感賦

宋 謝靈運

舉高檣於楊潭眇投迹於炎州貫廬江之長路出彭蠡  
而南浮於時月孟節季歲亦告墜離鄉春壤改時懷氣  
戀丘墳而縈心憶桑梓而零淚孟積雪而抽筍王斲冰  
以繪鮮萸柔葉於枯木起春波於寒川顧微心之庸褊  
謝精靈於昭晰擁永暮而莫從曾遐感而靡徹

孝思賦

有序

梁武帝

想緣情生情緣想起物類相感故其然也每讀孝子傳

未嘗不終軸輟書悲恨拊心嗚咽年未髫鬢內失所恃  
餘喘吟嬋媼相長齒過弱冠外失所怙限職荆蠻致  
闕晨昏江途遼遠家無指信髣髴行路先君體有不安  
晝則輟食夜則廢寢方寸煩亂容身無所便投刺解職  
以遵歸路於時齊隋郡王子隆鎮撫陝西頻煩信命令  
停一夕明當早出江津送別心慮迫切不獲承命止得  
小船望星就路夜冒風浪不遑寧處途次定陵船人損  
壞於時門賓周仲連為鵲頭戍主借得一舸奔波兼行

屢經危險僅而獲濟及至戾止已無逮及五內屠裂肝  
心破碎便欲歸身山下畢志墳陵長兄哀愍未說獨行  
續有北問強敵寇邊朝廷以先君遺愛結民咸思在昔  
故舊部曲猶有數千武慶宗將領留防彼鎮時便有旨  
使捍壽春王事靡監辭不獲免刺史崔慧景志懷翻覆  
遠招逋逃多聚姦俠大猾凶醜莫不雲集至如彭盜韓  
元孫等不可稱數倍道電邁奄至淮淝凶徒疑駭相引  
離散臺軍主徐玄慶房伯玉等欲襲取慧景乃固禁之

方得止息是歲齊明作相疑論未決密馳表疏勸徵慧  
景折簡而召必不違拒即重遣還以安其心姦渠既出  
緣邊無虞旬朔之間慧景反鎮即便解甲以歸京師因  
爾驅馳不獲停息數鍾百六時會雲雷撥亂反正遂膺  
四海念子路見於孔丘曰由事二親之時常食藜藿之  
食為親負米百里之外親沒之後南遊於楚從車百乘  
積粟萬鍾累茵而坐列鼎而食願食藜藿之食為親負  
米不可復得每感斯言雖存若亡父母之恩云何可報



慈如河海孝若涓塵今日為天下主而不及供養譬猶  
荒年而有七寶飢不可食寒不可衣永慕長號何解悲  
思乃於鍾山下建大愛敬寺於青溪側造大智度寺以  
表罔極之情達追遠之心不能遺蓼莪之哀復於宮內  
起至敬殿竭工匠之巧盡世俗之奇水石周流芳樹雜  
沓限以國事亦復不能得朝夕侍食唯有朔望親奉饋  
奠雖復得薦珍羞而無所瞻仰內心崩潰如焚如灼情  
切於衷事形於言乃作孝思賦云爾

感四氣之變易見萬物之化成受天和而異命稟地德而齊榮察蟪蛄於蚤睫觀鯢鵬於北溟彼含識而異見同有色而殊形雖萬類之衆多獨在人而最靈禮義別於飛走言語異於鸚猩念過隙之儻忽悲逝川之不停踐霜露而悽愴懷燧穀而涕零掩此哀而不去亦靡日而弗思仲由念枯魚而永慕虞丘感風樹而長悲雖一至而含生奉二親而何期思因情生情因思起導情源以流澍引思心而無已既懷憂以終身亦銜恤而沒齒

當閒居以永念獨拊膺而自傷徒升岵而靡瞻空陟岵  
其何望涕縱橫以交流血沸涌而沾裳覽地義以自咎  
懼滅性之乖方仰太極以長懷乃告哀於昊蒼冀皇天  
之有感何報施之茫茫曉百碎於魏闕夜萬斷於中腸  
心與心而相續思與思而未央晨孤立而縈結夕獨處  
而徊徨氣塞哀其似噎念積心其若狂至如獻歲發暉  
春日載陽木散百華草列衆芳對樂時而無歡乃觸目  
而感傷朱明啟節白日朝臨木低甘果樹接清陰不娛

悅於懷抱但罔極而纏心兼葭蒼蒼白露為霜涼氣入  
衣淒風動衷心無迫而自切情不觸而獨傷若乃寒冰  
已結寒條已折林飛黃落山積白雪旅鴈鳴而哀哀朔  
風鼓而颼颼目觸事而破碎心隨感而斷絕無一息而  
緩念與四時而長切年揮忽而莫返時瞬眴其如電想  
慈顏之在昔哀不可而重見痛生育之靡咎報顧復而  
無片悲與恨其俱興涕雜血其如霰燕青春而差池鴻  
素秋而翔翔去來候於節物飛鳴應於陰陽何在我而

不爾與二氣而乖張常茹酷而輪迴歷日夜而不忘既  
視丹而成綠亦見白而為黃擾性情以翻覆汨神慮而  
迷荒想鳴鶴而魂斷聽孤雛而心死慟終天而無怙號  
畢世而靡恃觀休屠之日碑宣教義之所及見甘泉之  
畫像每下拜而垂泣忍心動而不安遽入侍於帝室值  
何羅之作難乃舍之以投瑟超王臣之稱首冠誠勇而  
無匹士行已之多方見石他之有權身雖死而名揚乃  
忠孝而兩全顧丁蘭其何人家河內之野王時舞象而

方及始成童而親亡刻木母以供事常朝夕而在傍劉  
鎮就養而不暇常遠汲而力寡苦節感於幽靈醴泉生  
於竈下顧長沙之臨湘有古初之道始時父沒而未葬  
遇鄰火之卒起乃伏棺而長號雨暴至而火死又何琦  
其亦然獨柩屋而全止至如王祥黃雀入帳隄通橫石  
特起盛彥之開母目邢渠之生父齒覽斯事而衆多亦  
難得而具紀靈蛇銜珠以酬德慈烏反哺以報親在蟲  
鳥其尚爾況三才之令人治本歸於三大生民窮於五

孝置天地而德盈橫四海而不撓履斯道而不行吁孔  
門其何教

罔極賦

宋  
王禹偁

後周廣順太歲甲寅季秋戊子實生吾身稟粹和於兩  
儀荷鞠育於二親粵自始孩逮乎成人求名得名干祿  
得祿痛吾母之早終受君羹而含肉丁吾父之大憂徙  
倚廬以食粥被朝恩之抑奪履人事而悽迷五鼎或來  
羨仲由之斗米三牲縱具非茅容之隻雞豈無兄弟各

懷祿而悽悽亦有子孫方嬉戲乎孩提冗食兮紀綱之  
僕多病兮糟糠之妻望松楸以暮泣履霜露而晨啼今  
日何日家人舉爵祝我壽考勸我歡樂咸懸弧於茲晨  
念陟岵而淚落換斑衣兮純素變華顛兮總角孰謂儒  
者不如農夫良田十畝桑桑百株無求於人身何憂其  
悔吝必出於力養不間乎精麤父母俱存緼袍重襦子  
弟匪懈夕耕曉鋤雞豚掩豆黍稷盈壺草堂為壽其樂  
只且嗟乎吾不得而及也賦罔極而長吁



倚門望子賦

五代 梁 嵩

蒼蒼茫茫道遠倚倚望望情傷念蕩子之久別投慈心  
於遠方渺渺何之動幽懷於眷戀滔滔不返向上國以  
觀光當其截髮投師操心托迹遙望皇都俯登紫陌嚙  
臂於衛國門前題柱於升仙橋側擔簦日久希寸祿以  
資榮負米程遙仗何人而請益征輪蓬斷別騎塵飛涕  
眸睠睠凝思依依欲歷而既升雲路遙憐而獨倚柴扉  
汨沒難明我則每晨昏而悵望宗枝有托汝盍無早晚

以言歸常曠望於煙霄每淒涼於蓬華杳杳兮故路寂  
寂兮舊室幾行鴈陣空來萬里尺書難述水聲山色遽  
驚懷古之人別恨離情愁對秋風之夕眷戀徘徊愁心  
靡開抑鬱之情恒自切湮淪之事有誰哀念一葦於津  
涯誠難去矣聽孤鴻於碧落得不忍哉想彼淹留傷乎  
離索躊躇兮不止優游兮何托盈庭之萱草徒榮滿眼  
之蘆花自落楊朱陌上蕭條而恨淚潛潛漢武臺邊宛  
轉而殘霞漠漠悵陸海之高深念行役以難尋憶昔伯

俞之志寧無泣杖之心對月而常憐獨坐聞蛩而每憶  
寒吟動茲懷土之思為憑蜀魄觸爾還鄉之計暗託秋  
砧我我仲丘殷勤士子獻書之疏復何如干祿之心幾  
時止遣我日日望紅塵未見此心終未已

思舊賦

有序

晉  
向秀

余與嵇康呂安居止接近其人並有不羈之才然嵇志  
遠而疎呂心曠而放其後各以事見法嵇博綜技藝於  
絲竹特妙臨當就命顧視日影索琴而彈之余逝將西

邁經其舊廬於時日薄虞淵寒冰淒然鄰人有吹笛者  
發聲寥亮追思曩昔遊宴之好感音而歎故作賦云

將命適於遠京兮遂旋反而北徂濟黃河以汎舟兮經  
山陽之舊居瞻曠野之蕭條兮息余駕乎城隅踐二子  
之遺跡兮歷窮巷之空廬歎黍離之愍周兮悲麥秀於  
殷墟惟古昔以懷今兮心徘徊以躊躇棟宇存而弗毀  
兮形神逝其焉如昔李斯之受罪兮歎黃犬而長吟悼  
嵇生之永辭兮顧日影而彈琴託運遇於領會兮寄餘

命於寸陰聽鳴笛之慷慨兮妙聲絕而復尋停駕言其  
將邁兮遂援翰而寫心

懷舊賦

有序

晉

潘岳

余十二而獲見於父友東武戴侯楊君始見知名遂申  
之以婚姻而道元公嗣亦隆世親之愛不幸短命父子  
凋殞余既有私艱且尋役於外不歷高丘之山者九年  
於茲矣今而經焉慨然懷舊而賦之曰

啟開陽而朝邁濟清洛以徑渡晨風淒以激冷夕雪暘

以掩路轍含冰以滅軌水漸軻以凝洹塗艱屯其難進  
日晡晚而將暮仰睇歸雲俯鏡泉流前瞻太室旁眺嵩  
丘東武託焉建瑩啟疇巖巖雙表列列行楸望彼楸矣  
感於予思既興慕於戴侯亦悼元而哀嗣墳纍纍以接  
隴栢森森以攢植何逝沒之相尋曾舊草之未異余總  
角而獲見承戴侯之清塵名余以國士眷余以嘉姻自  
祖考而隆好逮二子而世親歡攜手以偕老庶報德之  
有鄰今九載而一來空館闕其無人陳芳被於堂除偕

圓化而為薪步庭廡以徘徊涕泣流而霑巾宵展轉而  
不寐驟長歎以達晨獨鬱結其誰語聊綴思於斯文

思賢賦

梁丘遜

宜顧問哉相然信死斯則結深念於撫翼跂雄飛而但  
起知我於財利之間何足多於鮑子目擊而道存至味  
其如水未見其人吾聞其理矣夫子長之託意甘執鞭  
於異世在慈明之慕義聊慙馭而追稅况至德之可師  
無兼裘以共敝有樂安之任子偉羣才而稱傑備百行

之高致該九流之洪藝諒可雜而非染迹每同而常別  
牆易入而難窺開無鍵而有閉思若神而泉涌翰如雲  
而積袂沉潛於懷抱之間蕭散於天人之際日下愧其  
未雙關西慙於上哲紛吾既有此固陋荷君子之渥惠  
塵非府而分深葉未移而好結尋宿草之宴處歷三紀  
於茲日性有同於杞梓心獲變於丹漆文何屬而不辯  
理何疑而匪質問不休而鍾叩答無窮而座謐

懷賢賦

有序

明  
郭 棐



壬子冬偕張伯鄰赴試南省道出長沙昔漢賈太傅左  
遷其地感墜馬而歎歎竟賦鵬以淪逝遊者輒增慨焉  
夫太傅起弱冠抗疏漢廷其通才朗識直氣雄文當時  
碩儒未之能儼洵一代豪賢哉追慕高風用綴賦言

維困敦之陽月兮余北征而溯長沙乘流風以鼓楫兮  
懷往躅而咨嗟繫太傅之懿美兮天畀之以修能抱貞  
白而不阿兮遭蒙霧而叢嗔棄赤電驟耳而弗馭兮謂  
款段之猶龍羌陳詞於未央兮竟出傳於藩封濬容與

而去國兮謫胡為乎中路心懽悅而蘊結兮情依依而  
回顧披楚氛而不敢怨兮念宣室而不能忘弔靈均於  
汨羅兮歌離騷而傍徨濯湘水以自潔兮紉秋蘭之芬  
芳苟心曲之無瑕兮雖隕穉其何傷噫嘻薰蕕混臭兮  
松蘿倒植土鼓雷鳴兮天球若礫姜斐貝錦兮廉貞屏  
斥醜正為邪兮緣曲詆直自古皆有此兮豈先生之獨  
盡是故比干剖心仲尼削迹子奇履霜萇弘血碧虞卿  
窮愁韓非憤戚伍員投淵申徒抱石或幽繫於南冠或

遭刑於荆璧或三黜而不回或一言而輒叱美固惡其  
獨擅兮名不可以早揚誠知前轍之拙斲兮又不能突  
梯滑稽與世而徜徉燦予心於皎日兮未改此度鳳翩  
翩其高舉兮宜下羣乎難驚歲睽睽其賤逝兮途歷歷  
其紆長遠紫闥而觀玄扈兮恐多岐而亡羊嫫女妒其  
蛾眉兮固恒態也懷瑾握瑜而見擯兮又何怪也曷帝  
閭以長顧兮知丹衷之不能諛悼先生之瓌特兮迺長  
籌而短算綰予綽以徘徊兮心侘傺而悲思氣鬱結而

不可平分緬流風而薦辭

贈言賦

有序

梁  
蕭  
綸

張雲麾聞望之美作牧南蕃維舟江漢留連飲餞發邁  
有期會面無日依依別袂恨恨江干古人贈別以言聊  
為贈言賦曰

昔人有感於知己深情投分如斯已矣相知勢利之間  
實君子之所鄙靜言神交之際亦難得而具美豈直鮮  
其令終曾自聞其善始日踰久而益敬蓋唯一人者爾

語同志而好合諒今古之皆然苟托御而自說徐因芻  
而請前況英聲與茂實乃絕後而光先似臨潭而對鏡  
若披霧而覩天欽愛顧之固已良佩服之在旃資淑美  
之上才超羣雄而獨峻德既深於萬頃牆有高乎數仞  
思若神而泉湧文如華而玉振伊薄軀之固陋謬攝官  
於夏汭知美錦之難裁處芬絲而易結幸中途而邁止  
仰旌旆之踟躕似德星之東邁類祥雲之西徂亟留連  
於河渚或終宴於城隅賞既延於賓友歡亦洽於僕夫

嗟灰琯之易逝慨離袂之云促惜日車之不駐恨流影之難續觀善誘而不倦餐好音而未足佇浮雲之可寄願無比乎金玉

懷音賦

有序

梁張纘

西平邵陵王以親賢近能作蕃夏首下走叨竊時命驅傳湘羅久託下風素蒙淑顧及塗經鄢郢淹泊累旬君王彈隋珠於千仞乃貽之以麗則詩云懷我好音敢為懷音賦云爾

伊宗周之令望巡召南而述職襟帶鄖夏之鄉宣條江  
漢之域服詩書於懷袖抱仁義於胃臆總九德以棲身  
橫四溟而撫翼循微躬之末迹謬馳傳於衡嶽由洞庭  
而左轉指鄢醴而為期仰芳塵於夏汭路將近而彌滋  
棹陵波以適驚舟望浦而倦遲自清光之未覲逾一紀  
以歷茲敢憑情於往昔逢君恩之未遺陪桂苑之良遊  
接蘭臺之高會既醉酒以飽德亦傾羞而緩帶感平原  
之愛客傷岐路之難留戀西園之餘賞泣南浦之徂舟

結煩言於將贈情有重乎琳球顧龍門其不見過夏首而西浮申服義之未沫長寄言於還郵

導游賦有序

元 袁 桷

陳邵袁桷家於甬之隅足不踰閩而四方交游往復之義亦能舉其槩聞吳興子昂趙子清名雅言為作導游賦道余所蘊亦以見夫思其人而不可見之意辭曰

嘗悲乎好游之士閱終歲而莫聞非秉志而媚私亦飾行以矯羣方其命車於王良假驂於造父過屠繒之沛



弔絃歌之魯許身結志慷慨偃倭抗銅盤以矢辭握幽  
蘭而結賦炫華堂之冰雪眇修途之霜露蓋將修斷金  
之利雖闕牆而莫我敢侮息肩於門晞髮於廬不一歲  
月迨見夫蠅聲而謦倚楹而吁雖千里之異殊何老壯  
之卒逾也世有索居肥遯塹門塞竇尊委俚之聞友汗  
青之朽是猶談智於尺寸測日於戶牖猛虎嚙嚼幽猱  
悲啾獨行無儔謹操其輶梁彼一士與時偕藏具大塊  
之清淑服忠厚以自昌余將往而未得倚吳山以相望

振衣中庭萬籟寂玄頤形廣顙兮翩翩墜余以言曰  
懷辛之椒人或議其妖亢梁之木人或惡其獨夫既自  
以為直而亦豈不以為曲阮生自持幾於目語削木已  
漫假手於祖匪達人之曠羈終察察乎廉隅余嘖然而  
笑喟然而思拂龜以占莫測其疑抑搔首而歎噓故髣  
髴以致期遂申之以辭連城之璧佩以容兮環龍之劍  
喜其鋒兮伊若人兮物不可同兮我欲從兮樂有終兮  
江山兮復長方舟兮可杭詞未竟童子擁篲而前曰豈

所謂千載之人邪吾當從子而西矣

求友賦答袁養直

元趙孟頫

思古人之不可見兮心鬱結而不舒登高丘而遠望兮  
獨歎慨乎增歎波洋洋其汜濫兮欲濟而無航膏吾車  
而孤往兮山鬱乎其蒼蒼四顧闐其寂寥兮思蹇產而  
不鑠采衆芳以自娛兮聊假日以愉樂寧長洲之夫容  
兮擘大澤之蘭茝擷江蘼之秀穎兮結秋蘭以為佩世  
俗方尚同兮余獨異乎今之人謂蘭茝為不芳兮蛾眉

枉之以善姪衆不可以戶說兮歷年歲而覲閔變心以  
從俗兮而吾又不忍徼朝陽之鳴鳳兮企空谷之白駒  
何鴛鴦之衆多兮鸚鵡紛其瞿瞿寧飢渴以需時兮恥  
屬饕餮乎腥腐古道久其弗繼兮吾惕焉為此懼何美人  
之好脩兮獨與余其同心懷余以厚德兮遺余以好音  
世固有同居而不察兮何千里而能同亂淞江之滔滔  
兮涉遠道以相從覲清揚之信美兮懷盛年而莫當子  
濯足於東海兮晞髮乎扶桑吸沆瀣以為飲兮餐朝霞

以為糧被列星之粲爛兮抱明月之夜光駕青雲而高  
馳兮鳴和鸞之鏘鏘擾蒼龍使挾輶兮服白虎以驅不  
祥願發軔其勿亟兮聊弭節而抑志指黃昏以為期兮  
夫孰遠而弗至亂曰鹿鳴呦呦猶求友兮曾謂斯人不  
如物之知兮獨行無儔吾將與子為類兮

思友賦

元涂幾

步平原之春雨寒綠陰以成幄懷美人於山丘悵音書  
之寥邈時也光風泛叢綠水揚波女條桑而侶行男負

新而載歌霽霽幽谷娟娟薜蘿良朋不來流光蹉跎慨  
嘉樹之生仁將遺余以秋實孰伊人之靈哲不反求而  
有獲屏葩華之浮辭奉溫恭之明式儻精微之可期庶  
永保乎貞吉

思友賦

明  
夏邦謨

何繁思之糾結兮中悶替以罔休晝屢餐而調饑兮寧  
膳籩之匪羞夢雜糅以恍惘兮曼旅夜之悠悠息壅弱  
其煩促兮心震蕩而若浮氣鬱鬱以填臆兮淚熒熒而

漲眸志沉抑而慊慊兮魂離散而難收罹顛躓以厄窮  
兮茲遷逐於海陬哀蕪城之卑濕兮古澤廣之所都形  
予子而窘束兮竊滯此其窮途覽芳菲之變化兮恒感  
物以增愁獸求曹而躑躅兮鳥失侶而啁啾矧離索之  
悽惻兮顧寂歷而無儔寥廓落而冥冥兮阻容與以優  
游極兄弟於四海兮偉曠士之徽猷人固各有所志兮  
焉深淺其相侔豈不語洽而貌澤兮惟知心之難求慨  
仲身之多艱兮得鮑叔而撫幽僑札相感於傾蓋兮或

獻紆而縞酬仰尼父之禮瑗使兮慕贈處於回由世重  
陳雷之懿行兮況以膠漆之相投王貢出以類聚兮慶  
廉義以為疇古固敦斯軌躅兮余於是之敢偷伐木興  
刺於鳥鳴兮谷風以棄予為仇張陳隙以反目兮蕭朱  
卒判然其相矛悲夫人之昧昧兮胡纖介而成訕喟斷  
金之日遠兮懼麗澤之皆流時矯首以遙望兮眇雲木  
之相樛夏山川之蔽虧兮邈傳置之迴修月輝輝而照  
夜兮霜稜稜以驚秋風蕭蕭而振樹兮雨汨汨以沉丘



情縹緲以快悵兮然侘傺而夷猶懷孤憤以紆鬱兮遭  
迴腸而優柔嗟百歲之易邁兮胡歡寡而多憂當其羣  
嬉而愉樂兮寧知愁苦而淹留欲翦迹而橫逝兮非弱  
質之勝褻欲蕩志以怡悅兮畏淫肆之為尤固自厲其  
不豫兮惟靜默之相攸庶尚友於古人兮考往則以臧  
謀



御定歷代賦彙外集卷七

# 欽定四庫全書

集部

御定歷代賦彙外集卷八

詳校官檢討<sub>臣</sub>劉所

主事銜<sub>臣</sub>徐以坤覆勘

總校官編修<sub>臣</sub>王燕緒

校對官中書<sub>臣</sub>陸湘

謄錄監生<sub>臣</sub>馮光恩

欽定四庫全書

御定歷代賦彙外集卷八

懷思

懷土賦

有府

晉陸機

余去家漸久懷土彌篤方思之殷何物不感曲街委巷  
罔不興詠水泉草木咸足悲焉故述斯賦

背故都之沃衍適新邑之丘墟遵黃川以葺宇被蒼林  
而卜居悼孤生之已宴恨親沒之何速排虛房而永念

想遺塵其如玉眇縣邈而莫覩徒佇立其焉屬感亡景  
於存沒惋隕年於拱木悲顧盼而有餘思俯仰而自足  
留茲情於江介寄瘁貌於河曲翫通川以悠想撫征轡  
而躑躅伊命駕之徒勤慘歸途之良難愍棲鳥於南枝  
弔離禽於別山念庭樹以悟懷憶路草而解顏甘堇荼  
於飴苾締蕭艾其如蘭神何寢而不夢形何興而不言

懷退賦

晉  
潘 尼

伊疇昔之懷憤思天飛以遠迹望循塗而投軌遡翔風

以理翮冀雲霧之可憑希天路之開闢何時願之多違  
奄就羈以服役困吳坂之峻岨畏鹽車之嚴筴嗟遊處  
之弗遇美鬱悒之難任背宇宙之寥廓羅網罟之重深  
常屏氣以斂迹焉遊豫以娛心傳釋版以亮殷望投竿  
而相姬窮獨善以全質達兼利以濟時聃安志於柱史  
由抗迹於蒿箕理殊塗而同歸雖百慮其何思敢因虛  
以託譚遂逡巡而造辭

思田賦

梁陸倕

歲聿忽其云暮庭草颯以萎黃風颭颭以吹隙燈黯黯而無光獨展轉而不寐何增歎而自傷於是跼蹐徙倚顧景興懷魂蕩蕩以至曙綴予想於田萊彼五畝其烏在乃爰泊乎江隈出郭門而東驚入澈浦而南迴爾乃觀其水陸物產原隰形便林藪挺直丘陵帶面臨九曲之迴江對千里之平甸風去蘋其已開日登桑而先見聽啁哳之寒雞弄差池之春燕臨塲圃以築館對樵軒而鑿池集游泳於階下引朝派於堂垂瞻巨石之前却

翫激水之推移雜青莎之霍靡拂細柳之長枝感風燭  
與石火嗟民生其如寄苟有胸而無心必行難而言易  
幸少私而寡欲兼絕仁以棄智忽學步而舉趾又追飛  
而厲翅瞻鹿園而竊高仰疆臺而慕義歷四時於逝水  
馳三稔於申臂望歸流而載懷情鬱悵其何寘

望故園賦

唐杜牧

余固秦人兮故園秦地念歸途之幾里訴余心之未歸  
兮雖繫日而安至既操心之大謬欲當時之秦技技固



薄兮豈易售矧將來之歲幾人固有尚珠金印節人固有為背憎面悅擊短扶長曲邀橫結吐片言兮千口莫窮觸一機兮百關俱發嗟小人之顛蒙兮尚何念於逸越余之思歸兮走杜陵之西道巖曲天深地平木老隴雲秦樹風高霜早周臺漢園斜陽暮草寂寥四望蜀峰聯嶂蔥蘢氣佳蟠聯地壯繚粉堞於綺城矗未央於天上月出東山苔扉向闕長煙苒惹寒水注灣遠林雞犬兮樵夫夕還織有桑兮耕有土昆令季強兮鄉黨附悵

余心兮舍茲而何去憂豈無念念至謂何憤悵悽悄顧  
我則多萬世在上兮千古居後中有一生兮孰為壽夭  
生既不足以紉佩兮顧他務之纖小賦言歸兮余之忘  
世徒為兮紛擾

懷鄉賦

有序

明丘濬

每因送人處憶得別家時此唐人詩也嗚呼為此詩者  
其能深體人情者哉某去家今十有六年矣鄉土之思  
無日而不展轉於懷徒以國家之制貶封之典必限以

歷官之歲月以故情事尚未申也去年冬友人劉君尚德應進士舉來京師久別而晤不勝空谷足音之喜今歲試禮闈不合而去某與尚德鄉曲交游中最厚者也因其別而動乎情方寸惻然有不能自己者因述中心所懷者以為賦一以寫吾鄉土之思一以慰吾母兄之望一以志吾朋友之別云

懷吾鄉兮何所渺雲山兮萬重界鯨波之浩漫兮途有梗之未通曰吾心之切切兮無日而不南征晝神想以

遐鶩兮宵夢寐而靡寧母氏垂白之待養兮伯兮獨立  
以煢煢雖顯揚之足慕兮恒喜懼以交并桑梓蔚其深  
茂兮昔可把而今拱耆舊日以凋謝兮哀纍纍其多壠  
朝吾登乎金門兮夕偃蹇乎玉堂置身非不高兮信美  
非吾之鄉入結羣仙之綬兮出聯七貴之鑣游從非不  
多兮匪吾髻黜之交退默默以獨處兮念平生之往事  
死山川與閭巷兮默其可指以示恨無縮地之術兮孰  
插予以雙翅馳寸心於萬里兮幾將歸兮猶未惟人情

同於懷土兮豈以窮達而異彼志得而情遷兮乃獨非  
人之類年洋洋其日往兮百歲幾何較富貴之與名節  
兮所得孰多苟情義之不申兮焉用其他幸吾子之茲  
來兮若聞足音於空谷也申申告吾以鄉曲之故兮語  
再三而不以為瀆也或為之忻忻兮或為之戚戚或可  
愕而可駭兮或可矜而可惜或慚而為之忸怩兮或傷  
而為之怵惕岷然而興兮俄然而衰奄然其去兮儻然  
其來歷寒暑十有六變兮恍如一瞬天人倚伏有必然

之理兮孰云邈而難信每促膝以劇談兮輒歎息而不  
休情悁悁而不自己兮涕或浪浪以橫流方資其朝夕  
以歲規兮胡數奇而弗售彼惟索驥以其圖兮曾莫知  
神駿之求君子出處惟其時兮樂天知命夫奚尤又將  
別予以去兮仍海上之仙丘闡天人之妙理兮傳嗣子  
以箕裘翩翩然以遐征兮嗟欲挽而莫留矢吾辭以志  
別兮因以寫吾之心行何以處我兮毋金玉乎爾音自  
薊北而越南兮閱半載之光陰既沿復遡止且行兮杳

不知山高而海深抵瓊臺而見鄉人兮道予心之永懷也慰吾親倚閭之思兮曰不久請告而歸也

思歸賦

有序

晉陸機

余以元康六年冬取急歸而王師外征職典中兵與聞軍政懼兵革未息宿願有違懷歸之思憤而成篇

節運代序四時相推寒風肅殺白露霑衣嗟行邁之彌留感時逝而懷悲彼離思之在人恒戚戚而無歡悲緣情以自誘憂觸物而生端晝輟食而發憤宵假寐而興

言羨歸鴻以矯首挹谷風而如蘭歲靡靡而薄暮心悠  
悠而增楚風霏霏而入室響泠泠而愁予既遨遊乎川  
汜亦改駕乎山林伊我思之沈鬱愴感物而增深歎隨  
風而上逝涕承纓而下尋冀王事之暇豫庶歸寧之有  
時候涼風而警策指孟冬而為期願靈暉之促景恒立  
表以望之

思歸賦

有序

齊  
謝朓

夫鑒之積也無厚而納窮神之照心之徑也有域而懷



重淵之深余少而薄遊身

原本闕一字

防方思俄然萬里晚

而自省諒非一塗

余菲薄以固陋受靈恩而不訾拖銀黃之沃若剖金符之陸離舟未濟而河廣途方遠而馬疲忽中寢而念厲魂申旦而九移昔受教於君子逢知己之隆盼被名立之羽儀沾官成之藻綬羌服義而不怠宣臨岐而喻變勢方迅於轉圓理好旋於奔電援弱葛而能升踐重岡而不眩信禔福之非已寧悔禍其如見大明廓以高臨

吹萬忻而同悅跨神皋之沃衍奉英藩之睿哲承比屋  
之隆化踵芳塵之餘烈懷齷齪之褊心無夸毗之誕節  
竟伊鬱而不怡賴遐討於先哲紛吾生之遊蕩彌一紀  
而歷茲自下車於江海涉青春於是時瞻崇岡而引領  
望大廈而長思雖曲街之委陋猶寤寐而見之况神交  
而通夢眇河漢於佳期爾乃眷言薄暮南眺悠然方整  
歸轡願受一廛老華城之直陌相洛浦之迴阡連飛甍  
於故友接閒館以懷僊臨南場以藝藿寄北池而采蓮

睇微英之霍霍望水葉之田田乃翦山木不日為功非  
輪非奘去斲去礮夜索綯而繞繞旦乘屋而芟芟竹櫺  
崎嶇而經北繩閑窈窕以臨東布茵蕭於疎櫟織芡亂  
於迴櫳於是籬插芳槿門拂長楊園桃春發憲竹夏涼  
晨露晞而草馥微風起而樹香無芳菲以襲予空旖旎  
於都房恒離居以歲月庸銷落而徒傷我聞時命有殖  
無遷徵事或在求理未甄譬豐草之區別隨霜露而天  
延背萱鮮於堂北尚幽幽而未捐苟外物以能惑亦在

應而無騫況朝霞之采可照瓊扉之飾方宣養以虛白  
之氣悟以無生之篇豈加璧之贈可動執珪之位能纏  
歸來薄暮聊以永年

思歸賦

宋  
王安石

蹇吾南兮安之莽吾北兮親之思朝吾舟兮水波暮吾  
馬兮山阿亡濟兮維夷夫孰驅兮亡巖風脩脩兮來去  
日翳翳兮溟濛之雨萬物紛披蕭索兮歲逶迤其今暮  
吾感不知夫塗兮徘徊徬徨以反顧盍歸兮盍去兮獨

何乎此旅

思歸賦

宋 王資深

祿有可慕祿有可去何則移孝為忠曾無內顧則祿可慕而可據上有慈顏以喜以懼故祿可去而不可寓噫吾父八十母髮亦素尚爾為吏賈焉遐路嗷嗷晨烏其子反哺我豈不如鬱其誰慙惟秋之氣至慘慄而感人日興愁思側睇江濱憶為童子當此凜辰百果始就迭進其珍時則有紫菱長腰紅芡圓實牛心綠蒂之柿獨

苞黃膚之栗青芋連區烏桺五出鴨脚受彩乎微枝木  
瓜鏤丹而成質青乳之黎蘋壺之橘蜂蛹淹齏榎樁漬  
蜜膳羞則有鵠鵲野鴈澤鳧鳴鶉清江之膏蟹寒水之  
鮮鱗冒以紫薑雜以茭首觴浮茱菊俎薦菁韭坐溪山  
之松篁埽門前之桐柳僕侍不譁圖書在右或靜默以  
終日或歡言以對友信吾親之所樂安閭里其滋久切  
切余懷欲辭印綬固非效淵明之所徧心恥折腰於五  
斗蓋自成人以及今未嘗一日侍旁而稱壽豈得不決

去於此時將恐貽患於厥後

思歸賦

明表表

旅荒徼以羈處兮心忉忉而多憂陽春逝以流邁兮曜  
靈迅馳而不留涉恢台之炎夏兮赫焦灼以鬱蒸瘴暄  
瞠以中人兮觸沈疴以驟興寒熱搏而襲逆兮苦疔崇  
之相乘乏單豹之內養兮二豎伏而伺升哀吾生之孔  
艱兮逢百罹以備嘗進觸藩以跼蹐兮退曳尾而推藏  
嘉魯連之肆志兮雖貧賤其何傷世好朋而習佞兮懼

婁直之構殃遯幽谷以逾紀兮忽奔走乎遐方豈好爵  
之我靡兮實簡書之可畏收孟明於三北兮蒙羸繆之  
渥惠奉周任之炯戒兮勉陳力以就位冀鉛刀之一割  
兮庶伐檀之無愧老冉冉之將至兮疾疢糾其相仍俟  
河清之幾時兮恐朝露之易零誦夫子之雅言兮疾沒  
世之無稱紛王事之鞅掌兮籲天闔而乞身積頽思而  
浸息兮憎愠愉以怵惕喟中情之莫我察兮眷懷歸而  
未得夜申旦以不寐兮就角枕而反側蟲薨薨以潛飛



兮聽空除之蟋蟀先秋氣以哀吟兮感時物之數易魂  
營營以夢歸兮覩故鄉之髣髴歎驚寤以在牀兮怊悵  
恍而愁愁昔鍾儀之囚晉兮操土風而不忘彼莊舄之  
仕楚兮詠越聲以徬徨覽季倫之奏引兮思娛老於河  
陽繹陶令之賦辭兮修初服於柴桑人情各懷土兮豈  
必經營乎四方余既不能徇華以苟祿兮又焉能棲棲  
於此邦孔接淅以違齊兮軻濡滯而出晝欽疏傅之炳  
幾兮脫桎梏於組紱梁歌噫以竄稽兮梅掛冠以遯吳

仲樂志於園藪兮張興思於蓴鱸鴻冥冥於寥廓兮超  
增繳而遠徂非斯人其誰與歸兮永逍遙於江湖亂曰  
玄鶚黑鳥號寢宮兮鳳凰翩飛匿林中兮人各有心紛  
不同兮靜躁殊趣貴中庸兮塊獨居此將安從兮我思  
古人希哲蹤兮

思北歸賦

梁江淹

伊小人之薄伎奉君子而輸力接河漢之雄才擘日月  
之英色絕雲氣而厲響負青天而撫翼德被命而不渝

恩潤身而無極何規矩之守任信愚陋而不肖愧金碧  
之琳琅慙丹雘之照耀樊天網而自離徒夜分而誰弔  
遭大道之隆盛雖草木而勿履誤銜造於遠國出顛沛  
之願始去三輔之臺殿辭五都之城市惟江南兮丘墟  
遙萬里兮長蕪帶封狐兮上景連雄虺兮蒼梧當青春  
而離散方仲冬而遂徂寒蒹葭於余馬傷霧露於農夫  
跨金峰與翠巒涉桂水與碧湍雲清冷而多緒風蕭條  
而無端援之吟兮日光迴狄之啼兮月色寒究煙霞之

繚繞具林石之巘岼於是臨虹蜺以築室鑿山楹以為  
柱上囂囂以臨月下淫淫而愁雨奔水潦於遠谷汨木  
石於深嶼鷹隼戰而槽巢鼃鼃怖而穴處若季冬之嚴  
月風搖木而騷屑玄雲合而為凍黃煙起而成雪虎蹯  
跼而斂步蛟螭轔而失穴至江蘺兮始秀或杜蘅兮初  
滋桂含香兮作葉藕生蓮兮吐絲俯金波兮百丈見碧  
沙兮來往霧蓋蓋兮半出雲雜錯兮飛上石照爛兮各  
色峰近遠兮異象及迴風之搖蕙天潭潭而下露木蕭

梢而可哀草林離而欲暮夜燈光之寥迴歷隱憂而不  
去心湯湯而誰告魄寂寂而何語情枯槁而不反神翻  
覆而亡據夫以雄才不世之主猶儲精於沛鄉竒略獨  
出之君尚婉戀於樊陽潘去洛而掩涕陸出吳而增傷  
况北州之賊士為炎土之流人共魍魎而相偶與蠪蛸  
而為鄰秋露下兮點劒舄青苔生兮綴衣巾步庭廡兮  
多蒿棘顧左右兮絕親賓憂而填骨思兮亂神願歸靈  
於上國雖坎壈而不惜身

懷歸賦

宋沈括

歸休乎嗟生亦勞兮歲常九行而一息四方已莫不異  
兮欲終往而安即披荆榛以孤鶩涉大塗之梗塞投屨  
顏以坐入孰為眠而朝食營款一山而百折兮況千里  
之繚遶高浪鱗捲而電劃兮近不保乎咫尺嗟乎子乘  
此而安之兮託扶搖以寸翮吾一念子之往兮意允兀  
碑而屹栗彼夫人之聖哲寧有欲乎顛躓摩冥冥之無  
窮抽萬世之潛默雖皎中而自信亦終坎坎而莫覩來

之不可與謀兮果去亦庸何惕既振轡而大驅兮盍倡  
徺其所適期無羨於古人兮苟亦善吾之令德終曠蕩  
之可驤兮信幽履之不惑

懷歸賦

明 徐禎卿

永濡跡於都邑歷壯覽以徘徊仰桂殿之宏麗峙天闕  
之崔嵬配辰樞以作極扼喉襟之要樞臨飛閣之杳眇  
倚曲檻而躊躇望靡靡而無畔廓千里而丘夷懷勾吳  
之下邑嗟隔越之可悲心愴愴以增戀魂營營而外馳

宣茲土之匪樂哀故鄉之日遠望浮雲之南翔慕征鳥  
之東飛歎予躬之棲旅長淹留以何須大風鬱其夕興  
振四野之黃埃天慘惻而沈晦失南北之輿陟樹木淒  
其號戾鳥索羣而鳴哀愁塞耳而顏望掩愁思之彌彌  
夜展側而不寐步客庭而踟躕戒膏秣以至旦逝言返  
乎舊廬

歸歟賦

宋 楊萬里

繫端月之涉七兮諏其日則曰人倦予游於道路兮念



求以憩予神豈不愛窻月之娟好兮睡鄉微予以卜鄰  
曾不及於解衣兮遑暇脫予之巾脫栩栩以一適兮忽  
乎還家而及門忘予身之為羈兮驟喜覩予之親炯鶴  
髮之垂垂兮一哂以勞予勤環兒女之挽鬚攬袖兮犬  
雞亦為之載欣予親呼酒以予酌兮奚未舉而既失驚  
客舍之已晨兮牕不見月而見日風挾寒以薄人兮巧  
尋罅以入室纔予親之膝下兮夢覺而千其里湛清臚  
之易溢兮潛予面其如洗推予枕其不能寐兮捐衾裯

而又不能起嗟予生之艱勤兮墨兵納我於學林慕黃  
口而輕予之明月兮以耒耜而易搢紳既自山海之棄  
而粥於市兮又何歎池沼而籠馴羌初心之豈其然兮  
亦曰負米而為貧家焉釜吾親兮公爾以芹吾君惟是  
行之猖狂兮隨薦書以叫閭謁帝室而乃覲兮豈不就  
於一列其如釜甑之空兮履無當而衣有結樂調飢而  
濟渴兮總幸有曾冰之與積雪仰玉都之造天兮非都  
盧其奚躡久而顧予之蹙足兮欲自乘於汗血夢歸而

不歸兮不念吾親之指囑歸歟歸歟宣南溪之無泉兮  
南山之無巖

歸去來賦

宋  
王十朋

歸去來兮終日思歸今已歸嗟連歲之行役兮誤甘旨  
之屢違身雖處於異鄉兮念長在於庭闈陟高岡而東  
望兮悵白雲之孤飛食糞鹽而無味兮悟蝸角之真非  
泛季卿之竹葉兮詠晨光之熹微辰未浹而到家兮指  
青燈而扣扉粲慈顏於一笑兮紛稚子之牽衣雖吾歸

之不若人兮不能衣錦而乘肥吾將以此而易彼兮學  
何蕃其庶幾

宣歸賦

有序

明  
李夢陽

正德九年是歲甲戌厥月辛未臣以居官無狀得蒙寬  
譴罷歸迺作宣歸之賦其辭曰

昭浮清以覆育兮北斗平均而酌時蟪蛄微細而先秋  
兮水知寒而流漸疾余生之蠢特兮性重剛而習坎吾  
既悻直獲斯厲兮孰復訟心於顛頷悲羣志之詭異兮

恒忌勝而營己與己好則曰好兮忍憎蛾眉而攻毀繫  
聖人無小大兮吾聞大道以天下為公彼黨同以掩飾  
兮繫非儔而謂忠惟古人之醜偽兮逆四夷而投北胡  
今士之婪穢兮廉之則云伐德帝板板以遼廖兮九天  
立而雲征漭汶汶以頌夢兮豈察詳而悉情滂澄清厥  
躬殆兮原靡豫而遭放美余焉獲茲嘉閒兮詔冠帶以  
流浪晨靈雨以揚櫂兮遡江漢之滔滔背朱明之游颺  
兮面長庚而北道瞥九江余習儵兮超大別而逾迅介

夢澤以洋洋兮風沔郢以遵順宵認參昂兮晝諦波濤  
痛定思痛兮瘋前車而內忉衆乖滑以善憎兮尊沓嗒  
而背訛譎嫵嫵以朋附兮瑣刺齷而陽紿余惡以披  
離兮矯九仞之翩翩趨溷悶以孤變兮巢雲柯之蔽芾  
彼叢噪以側眸兮含沙射而伺予夥千百以一致兮標  
寤言而誰語陋嘍呶之僞態兮譸偃僂唯趨生揆直  
俾之曲兮民炎門礪而肉魚腹膏血以日富兮佯減儉  
以豪素哀窶人之填寡兮彼醲鮮袒而號呼心與迹旣

我逆兮焉飲食之遑寧憤粉飾之亂姣兮疇知余結駟  
而憑膺時鏢金之冰鬚兮吏抱牒環而相勿汗簌簌以  
零案兮風薄肌之瑟瑟恟潰澮以煩擱兮念偃仰之不  
可得報束帶以例趨兮衷眩戰而狐惑徒文繡之外彪  
兮內棘戟其誰知思翫慢以整遷兮則又懼素餐而神  
災吾寧轟轟烈劣撇與世還兮良不忍骹骹齷齪與草木  
而塵埃惟代謝之飄忽兮慨顏蹠逝而黃丘究萬變以  
定命兮孰長存而竟留懲夙昔以質行兮吾幸夫前路

之尚脩余指日月之顯隅兮迴巖阿而槃考徙桑若以  
敷蔭兮移嵩華而分島仰峰嶸之嶽岑兮俯泉瀨之磻  
磻穆眇眇以潛處兮探理窟之英邃合性命而諗一之  
兮周覽陰陽之轉圜橫宇宙以長觀兮驗妙門之玄玄  
混沌及而天地覆兮堯桀泯而誰分篤述作以強志兮  
吾豈願來者之盡聞

述歸賦

有序

明

何景明

僕聞之殊途者不可以同觀異趣者不可以強翕故嗜



竿者不媚之以瑟好圓者不進之以矩何則殊途而異  
趣也故賈子投荆南仲舒屏江都屈原游澤畔三子者  
非容之不能謀有不合有不可以容者矣故射者不為  
人易其穀琴者不為人改其操故師可易而法不可易  
也是以物有不以貴易賤富易貧榮易辱者矣故茂草  
不負垣美穀不生轍懼所托者非也是故求樂其心者  
不求華其身求顯於後者不求耀於今故夫子周流刪  
述墳典筆削魯史左氏著國語馬遷紬史記荀卿董子

之流皆有論譔大抵困屈窮阨發憤述作茲數聖賢者  
寧徒耀於當世哉僕少執寡昧竊有慕於古人之義弱  
冠即仕出入班行者已越六歲頗有齟齬之歎焉正德  
戊辰皇上御極之三年詔許罷歸鄉里得侍親膳既荷  
洪宥殊協夙情於是始欲究著作之原博覽歷之勝竊  
附一家之傳庶艾不稱之戒僕嘗以漢之文人工於文  
而昧於道故其言雜而不可據疵而不可訓宋之大儒  
知乎道而嗇乎文故長於循轍守訓而不能比事聯類

開其未發故僕嘗病漢之文其道駁宋之文其道拘反  
復求斯尚未有得要之鄙意則欲博大義不守章句而  
於古人之文務得其宏偉之觀起曠之趣至其矩法則  
閉戶造車出門合轍不煩登途比試矣然又欲倣子長  
好游之意抗志浮雲轍迹九有以博其大觀以成其文  
章斯亦不墜古人之餘烈哉於是敘出處之槩援聖賢  
之風掄始終之志作述歸賦豈敢自附於前哲用以勗  
之於將來矣辭曰

有申氏之遺封兮吾顯祖乃肇家洎大人之有立兮遂  
振藻而揚華爰伯昆之繼美兮惟末身以降予實獲夢  
之曰吉兮日舍寅而筮嘉予既承此幼美兮懼服志之  
不遐登隴坂之陂陀兮泛涇渭之洪波極崤函之重塞  
兮由惇物與太華覽鄴鎬之餘風兮沂漆沮之遺歌究  
城隧之湮沒兮哀二世之禍羅雖孺齒以隨侍兮虞年  
歲之日加飭華驥以西返兮恐修路之蹉跎忽天門之  
廣開兮值日月之盛明願自飭以進君兮得近君之末

行鬱文昌之中興兮聳圖闕之卬卬揭華蓋於正殿兮  
翼玉闥之與金庑塊層臺之隆起兮麗複道之委長儼  
宮觀之榮瞻兮接修翼而翱翔奉鸞車之清塵兮竊黼  
帷之下光服恪勤於朝夕兮冀予衷之必揚倏天地之  
易位兮星辰錯而無綱聿迅飈之亟至兮會浮雲之徂  
征憂雪霰之交增兮履中庭之凜霜紛衆莽之凋毀兮  
恥孤栢之獨芳豈予情之耿介兮實悲夫蕙華之搖傷  
顧涓忱之莫彰兮敢幸澤而干榮仰皇度之寬綽兮得

屏放於故鄉歲戊辰予南驚兮臨大路而高車眺玄宮  
之闌曠兮倚修城之曲隅泊潢潦之濡轍兮白日曠而  
忽逾塵曖曖以蔽空兮風發發而揚衢視僕御之零涕  
兮駢悲俛而不驅遵涿野之通行兮經蚩尤之故墟陟  
燕昭之崇臺兮訊樂毅之所居覽冀州之圯址兮式有  
虞之故都出晉野以于邁兮行谷亘以逶迤下滹河之  
隄洲兮接邯鄲之修途企魯連之風烈兮雖異世其勿  
渝懲奢麗之覆亡兮憫豪盛之靡餘朝予濟乎洪河兮

夕弭駕於淮濱逝逍遙於故城兮耽極樂於桑梓治丘  
墓之穢草兮考先祖之德裔侍顏色於閨闈兮服左右  
於居起分崖谷以畢處兮辭纓綈而不縻啓衡門而葺  
茅兮循蘭徑之委委藝嘉菊之百畝兮采芳若於中沚  
伊予既秉茲之超寂兮恐邁吾之盛年檢古人之遺美  
兮心竊傲而不敢愆樹六藝之旌節兮散百家之遺編  
殫仁義之遐風兮略眇小之陋觀下何探之不幽兮上  
何求之不玄乘二儀而列三光兮揜九區與八埏揚素

筆之芬烈兮修薄辭以為篇綴大賢之緒論兮紹斯文  
之未傳曷章句之足守兮發矩矱之自然汲時日以迅  
厲兮惡名稱之不延昔夫子之喪位兮迺周流而轍環  
望龜山之蔽翳兮去魯國而盤旋臨河水之洋洋兮托  
哀操於鳴絃疾予心之迫隘兮願輕舉而遠旃羌筮日  
以造游兮嚴吾蹇之翼翼飭桂衡之超駕兮舉采旄以  
前飾乘白螭於上裛兮曲文蜺於兩服張孔雀之翠蓋  
兮諧鸞音於下輻施結璜之委珮兮謹垂鞶之儀式涉



洛水之靈波兮恐宓妃之不得使文魚以媒之兮怨約  
言之我食抗予力於江南兮秣吾馬於漢側豫遊女之  
不信兮解予袂以明德順湘流而下沿兮望九疑而夕  
發從二妃以並翔兮忌神人之相越離江夏以東邁兮  
覓吳越之所在弔夫差之故宮兮尋伍胥之濤瀨痛麋  
鹿之游宮兮悅鴟夷之被害極禹穴之幽冥兮窮會稽  
之勝槩慕泰伯之清聖兮欽季札之耿介勗余馳以流  
汎兮安崇卑之不臨北旱海之爛灼兮西太素之積陰

水洄結以承輿兮霜霰零而接岑南陸屈以暑徂兮或  
綬蛇之陵侵取岵夷以極行兮盼東海之漫淫怵天地  
之冥晦兮懼陵谷之隳沈速反轍以旋服兮息余丘之  
茂林終養恬以順年兮厭予心之所諶世滄濁而莫察  
兮修短錯而不倫芻桂芝以秣蹇兮各糠粃以飼人豢  
罷牛而被以文服兮良馬棄而不陳賤馨烈而不御兮  
反逐臭於海濱予憂乎鳳凰之不鳴兮豈云係夫麒麟  
彼蘭草之國香兮斂空谷以自珍聊委順以祈齡兮吾

又安尤夫人亂曰南有嘉木有鳥居之朝破其巢夕則  
去之代愈下兮詩書道微曷曰予不還歸即彼昭昭去  
彼汶汶今則靡榮後有問兮

感離賦

有序

魏文帝

建安十六年上西征余居守老母諸弟皆從不勝思慕  
乃作賦曰

秋風動兮天氣涼居常不快兮中心傷出北園兮彷徨  
望衆墓兮成行柯條慙兮無色綠草變兮萎黃感微霜

兮零落隨風雨兮飛揚日薄暮兮無悰思不衰兮愈多  
招延佇兮良久忽踟躕兮忘家

感別賦

有序

晉傅咸

友人魯庶叔雅量弘濟思心遼遠余自與之相長情相  
親愛有如同生其後選太子洗馬俄而謬蒙朝私猥忝  
斯職雖懼不稱而喜得與此子同班共事天下之遇未  
有若此周旋三載魯生遷尚書郎雖別不遠而情甚悵  
恨作茲賦云爾

嘉天地之交泰美萬物之會通悅朋友之攸攝慕管鮑  
之遐蹤退以文而會友欽公子之清塵信同聲之相應  
意未寫而情親誓稚好之齟齬分綢繆而日新蘭蕙含  
芬有時而馨龍驤跼足有時而征乾道變化時惟大明  
戕戕睦友載揚厥聲降聖宰之旌招曜羽儀之上京贊  
唐虞之嘉運超飛躍乎太清佩銀璫於帝側拖紫艾於  
天庭瞻宸極之眇眇喜吾子之寵榮無荆玉之夜觀猥  
齊景於夜光敢有覲於斯舉欣與子而並翔天啓其願

自忝蘋蘩幼則同遊長則同班同心厥職其臭如蘭庶  
績未凝聖朝疇咨顯佐納言先綜萬幾出順景而為偶  
入閔然而無依步虛宇以低迴想宴笑之餘暉竟纏綿  
而彌結淚雨面而霑衣

感別賦

有序

明 皇甫汈

戊申之秋八月初吉季弟水部郎子約以制滿還闕而  
余羈紲都亭移書告別發函披誦悲不能勝嗟乎丈夫  
之生自懸弧矢以來孰不有志於四方故曰人豈鹿豕

也而可常聚乎此光祿之賦惜其淵雲詞靡而病於兒  
女情多蓋別不足以興悲而情有所感於別則悲可知  
矣因誤茲賦以代餞云爾辭曰

別方異緒離狀殊端在有情而必款豈同氣而能堪輶  
車陳於垆側舟櫂戒於江干或感慨於川逝或行嗟乎  
路難涕臨觴而共投心執袂而俱酸善哉江生之言曰  
黯然以銷魂值我愛弟適往帝閣愧雙鵲之並舉今矯  
乘鴈而孤騫若夫未營四方聊事一室侍讌庭闈聯經

几席辨索研墳游璣討歷繹孟氏之有三詠詩人之既  
翕至其恭承嘉惠忝竊龍光仲兮叔兮乃以軒而以翥  
伯也季也復載翱而載翔或影纓於建禮或結綬於文  
昌或馳麾於趙魏或沿牒於楚湘乍乖雲雨少別關山  
旌指洛而將赴裘滯秦而未還行行路何極去去情不  
忍寄芳草於春池攬素毛於秋省夏暑溽而扇違冬飈  
厲而衾冷顧奚別而非悲抑奚悲而云甚迨夫丁辰荼  
酷軫患纏絲乾覆奄奪慈景俄殲悼金昆之脆質凋玉



樹於華年同朝露之溘盡展夜壑之已遷繁慶往而弔  
來亮福倚而禍伏豺狼逞凶蜂蠆隱毒構曾參為殺人  
收張儉而屬吏謂死灰其不燃詫凝脂之可畏投清流  
使合汙惡獨醒而強醉胡人心之險巇兮亦天道之冥  
昧賂荀翰而在宥兮囊無金之可致鄒投珠而遭盼兮  
和抱璧而蒙冤乏文姬以請駟兮望融弟為急原得與  
喪其齊塞兮退未遂而觸藩肆蒼鷹之亂紀兮實桀犬  
之餘孽隕東晉之玄風兮黜西州之英烈誰百口其相

鳴兮空撫鏡而存舌中郎奮於鉗徒兮應相起於溺摺  
尚錄過於代門兮布揚芬於漢闕將逆施於末路兮終  
雪恥於前哲斯時也雖具邇其含悵矧駕言以遠別遵  
首路之逶遲兮睇蕭晨之淒緊憑江閣之交疏兮見中  
洲之帆影淮水落而彭城荒燕雲飛而冀門近想天上  
之仙班恍夢中之幻境粲西笑而心搖託南樓而跡驚  
追二陸於疇昔兮緬兩到之徂征置美酒以高會兮列  
祖讌於華楹徵綺羅之妙舞兮被絲竹以新聲懼堂中

之蠟燭忘戶外之驪鳴雖擬跡而同別亦原悲而異情  
憤世道之黜黯兮請以余為殷監衆女嫉茲蛾眉兮均  
自沈於明艷客方誠乎用光兮嵇弗戢而罹患雲賦就  
而晚疲賈書上而早譴齒何貴而象焚鄴乃災於豹變  
庶養德於木雞毋處才於能鴈辟涉海而獲濟兮諳風  
波之苦辛傷虎口而幸脫兮猶心悸而告人疾已痼而  
復初兮舉藥石以具陳羽有落於虛彈兮咎無蹈於震  
鄰紛余季之玉秀兮又襲之以蘭芳振逸響於寥漢兮

赫挾藻於明光恩被命而優渥兮德潤身而彌彰渺岐  
分於川岳兮瞥星散於參商昔時兮送余余今日兮  
送子若迭代於天運匪往復於人事喜何劇而無悲悲  
何窮而無喜情生文以敘離詞因情而敘思腸屢絕於  
停毫泣欲盡而盈紙願行者其勉旃悅居者之已矣

歎別賦

梁劉潛

在羈旅兮為思每居常而不樂意難偕於駘蕩情易邀  
於隕穫愁非招而自來憂試排而不却退求己以自省

慨撫衿而太息位不俟於一進髮徒彰於二色名有似  
於務耕學無均於譬織在初歸之為慶庶因拙而自收  
保私庭之宴喜共昆弟而嬉遊校小文於搖筆比楷式  
於臨流止每歡於接膝行如喜於同輶忽一去而數千  
遂離居而別域阻同被於當寐乖共餐於終食唯憑遠  
望以代歸負相思其無力

離別賦

有序

梁張纘

太常劉侯前輩宿達余在紉綺之歲固已欽其風矣及

理棹江干攬涕還望采蕭之詠不覺成篇

彼劉侯之矯矯承世德之清輝挺荆衡之箇籟輝江漢  
之珠璣昔相知於一定逾盛衰乎二紀豈因媒以成親  
非彈冠而來仕分自諧於金石情冥符乎蘭芷忘時輩  
之後先略相知之年齒及胥過於雲閣又方駕而聯曹  
宵擁衾而暗語晝稅鞅以遊遨案方前而等食衣共體  
而同袍猶合歡之謁念如來蘇之釋勞惟吾人之與子  
兮諒不言其已召在百代而奚殊雖千年而同調寧風

波之所移豈流俗之能要非高唱而云擬逢下士而或  
笑陽願言於信次尚眷眷而興懷矧雲崖之遠訣抱離  
袖而長乖顧龍門而掩涕瞻郢路而何偕在驚禽之屢  
感迫徂年之長暮眺湘沅之分流遵洞庭之永路山峻  
高而易隱浦迢迴而難泝援啾啾而夜吟鵲騷騷而曉  
度撫客子兮何心能辭鄉兮別故抱荃蕙之遺芳共離  
披於霜露

別賦

梁江淹

黯然銷魂者唯別而已矣況秦吳兮絕國復燕宋兮千里或春苔兮始生乍秋風兮暫起是以行子腸斷百感悽惻風蕭蕭而異響雲漫漫而奇色舟凝滯於水濱車遲遲於山側權容與而詎前馬寒鳴而不息掩金觴而誰御橫玉柱而霑軾居人愁卧恍若有亡日下壁而沈彩月上軒而飛光見紅蘭之受露望青楸之離霜巡層楹而空掩撫錦幙而虛涼知離夢之躑躅意別魂之飛揚故別雖一緒事有萬族至若龍馬銀鞍朱軒繡軸帳



飲東都送客金谷琴羽張兮簫鼓陳燕趙歌兮傷美人  
珠與玉兮豔暮秋羅與綺兮嬌上春驚駟馬之仰秣聳  
淵魚之赤鱗造分手而銜涕感寂寞而傷神迺有劒客  
慙恩少年報士韓國趙廁吳宮燕市割慈忍愛離邦去  
里瀝泣共訣投血相視驅征馬而不顧見行塵之時起  
方銜感於一劒非買價於泉裏金石震而色變骨肉悲  
而心死或迺邊郡未和負羽從軍遼水無極鴈山參雲  
閨中風煖陌上草薰日出天而曜景露下地而騰文鏡

朱塵之照爛襲青氣之烟煴攀桃李兮不忍別送愛子  
兮霑羅裾至如一赴絕國詎相見期視喬木兮故里訣  
北梁兮永辭左右兮魂動親賓兮淚滋可班荆兮增恨  
惟樽酒兮敘悲值秋鴈兮飛日當白露兮下時怨復怨  
兮遠山曲去復去兮長河湄又若君居淄右妾家河陽  
同瓊珮之晨照共金爐之夕香君結綬兮千里惜瑤草  
之徒芳慙幽閨之琴瑟晦高臺之流黃春宮闕此青苔  
色秋帳含茲明月光夏簟青兮晝不暮冬釭凝兮夜何

長織錦曲兮泣已盡迴文詩兮影獨傷儻有華陰上士  
服食還仙術既妙而猶學道已寂而未傳守丹竈而不  
顧鍊金鼎而方堅駕鶴上漢驂鸞騰天暫游萬里少別  
千年惟世間兮重別謝主人兮依然下有芍藥之詩佳  
人之歌桑中衛女上宮陳娥春草碧色春水綠波送君  
南浦傷如之何至迺秋露如珠秋月如珪明月白露光  
陰往來與子之別思心徘徊是以別方不定別理千名  
有別必怨有怨必盈使人意奪神駭心折骨驚雖淵雲

之墨妙嚴樂之筆精金閨之諸彥蘭臺之羣英賦有凌雲之稱辯有雕龍之聲詎能摹暫離之狀寫永訣之情者乎

別賦

明  
陳子龍

漫漫長道悠悠我心揚舲極浦總轡荒林與子言別愴然哀吟仰視浮雲倏忽難尋我有旨酒慨慷酌斟况秋風兮渡河又落日兮在野葉蕭蕭而羣飛泉淙淙而始瀉指寥廓於翔鴻慙悲鳴於去馬覩徒御之紛馳傾芳

樽而不下含別緒兮孔多欲陳辭而難寫於是攬袪徒  
倚執手踟躕會當去我頃刻相逾聽車音而絕響望襜  
幃而載徂况懷人之極目愧送子之賤軀掩金鏡而罕  
御理瑤琴而常孤仰明月之迅邁悵重關之崎嶇言念  
古昔誰與為此至若祖道浙江歌驪易水擊筑漸哀舉  
杯數起入虎狼兮不復還感烏馬兮誰能理信事君兮  
無二心憤國讐兮慚壯士獨臨風以唏噓咸攀轅而莫  
止乃有河橋送客灞上辭人奉使隴外之官漢濱念殷

勤於京洛忽散漫於風塵嗟官局之有守欲翰飛而無  
津陳嘉核於錦幄寫繁奏於陽春日行暮而款款車遵  
道而轉轉又有陷敵避讐遠適異國隱漁艇於江南築  
高臺於塞北望舊里今天涯遇故人兮相匿逝將別以  
起舞臨交岐而置食託黃鵠而神傷撫瓊枝而歎息至  
若廬江少婦文園小姬恩方膠固義當乖離痛寶玦之  
既賜出金屋而長辭陳后長門之賦班姬紈扇之詩一  
朝失職相見無期瞻鑒聲於咫尺慨音徽之永違更若

漢武好武絕域稱藩賜美人於朔漠嫁公主於烏孫夏  
積雪兮天山春無草兮玉門莫不凜乎變色悽然斂魂  
改紅顏兮白髮掩青塚兮黃昏思金堂之縹緲念鴛侶  
之嬋媛又若妾居北里君戍交河夜飛白羽朝負瑯戈  
迷鳴沙之異響捲陰風而震波悲傳竇女望斷秦娥寄  
文章於縑素託流怨於纖阿聞邊烽之未靖悼玉貌之  
蹉跎至有銅臺尚食之伎茂陵薦寢之女宮車晚駕曠  
然獨處惜餘香之在幄顧遺容之無所憶緒言於生平

愴永訣於終古玉盃出兮人間魚燈明兮下土豈若上  
宮麗質邯鄲名倡皎皎牕牖盈盈道傍解雜佩兮贈君  
子折芳馨兮心內傷則有煙林花墮平皋草長青驄蹀  
躑紅袖徬徨遠與君別各天一方飄搖分袂杳若參商  
嗟夫別何年而不愁愁何年而能散陋羣遊於麋鹿壯  
遐征於羽翰苟兩心之不移雖萬里而如貫又何必共  
衾幃以展歡當河梁而長歎哉

別知賦

唐

韓愈



余取友於天下將歲行之兩周下何深之不即上何高  
之不求紛擾擾其既多咸喜能而好修寧安顯以獨裕  
顧阨窮而共愁惟知心之難得斯百一而為收歲癸未  
而遷逐侶蟲蛇於海陬遇夫人之來使闢公館而羅羞  
索微言於亂志發孤笑於羣憂物何深而不鏡理何隱  
而不抽始參差以異序卒爛漫而同流何此歡之不可  
恃遂駕馬而迴輶山礧礧其相軋樹蓊蓊其相樛雨浪  
浪其不止雲浩浩其常浮知來者之不可以數哀去此

而無由倚郭郭而掩涕空盡日以遲留

別知賦

元虞集

余忽忽處此之無故兮幾偃蹇以自窮逝斂裳以遐征  
兮抗九霄之雲風頰三辰之徘徊兮遲後古以為期何  
夫子之俟俟兮亦踉蹌而在茲吁嗟乎世德之浩浩兮  
恥謂人以不賢陳珮玉於交達兮被徒輿以瑤環設厚  
顏之鬱沈兮孰敢即問手津涯發疾叫於咽嗌兮衆披  
靡而莫支夫冶倡之狐惑兮豈不足於內揆顧西子之

蓬垢兮益返忌兮令姿惟前聖之無悶兮老氏亦貴夫  
知希顧涼薄之多懋兮猶慷慨而尚辭余固將去此而  
無悔兮念夫子之與我日進余以不及兮又證余以其  
可余嘗究往來之為道兮論因革之為權莫或知其渥  
落兮子獨謂其固然庶久子以自輔兮克有聞以時行  
忽先我而南驚兮殆若為乎余情迺歌以送之曰長江  
渾渾兮春多浪波白日耿耿兮擊楫為歌天薄我賦兮  
非以病我吁嗟兮昔之盛者何其多

別友賦

宋 黃庭堅

曩聞義於孫李指尊選以見招惜予行之舒舒曰其夜  
以為朝予望道於垵垣見萬物之富有恨逸駕之絕塵  
又驂予以四牡喟後車之無策其四方乎索友仰雲飛  
而注弋俯淵觀之沈鈞或一能之勝予忘日月之不予  
謀或登吞舟之鱗或下垂天之翼手予弓而不釋恐斯  
道之或息維廬江之四李三隱約於龍眠維若人之仕  
蚤懷明月而麗川歲庚午而會梁語聞道之大用吸江

漢以為深累丘嶽以自重尾繫之而首應西犯之而東  
抗棄旗鼓而不逐儼其陳之堂堂偉道學之崇崛增懦  
夫之激昂觀日出於東方雖食焉而不吝無肯綮以自  
試居自喜於游刃彼覆却之萬方期斯言之猶信水渾  
渾而進舟風剡剡而侵裘恐事親之不歡則推是之同  
憂

別友賦

元  
危  
素

余生楚南之窮邦兮嗟不逮乎古之人執簡策以永歌

兮視前行之逡巡悵風氣之日凋兮衆糅雜乎滓穢獨  
涼涼而奚適兮虞誅言之交至能服仁而蹈義兮雖顛  
沛庸何傷顧操踐之或怠兮悲絲染之玄黃思驂雲螭  
以高馳兮下覽觀乎四海帶玉璐而佩寶劒兮劃長嘯  
乎天之外值美人於丹丘兮云抱朴之來孫朝吸上池  
之沆瀣兮夕掇玄圃之芳蓀獵六籍之精華兮悲黃農  
之不吾待並駢駢之良馬兮欲導車輪而言邁有疑義  
而與析兮且交修予之慝豈私情之昵比兮將以緝乎

道德懷夫子之固窮兮雖制義而自安顧甘旨之或缺  
兮寧孝子之所歡念一門之孤惇兮而衣食之莫具汨  
奔走於泥塗兮歲冉冉而遲莫輟彭澤之孤權兮愛東  
憩手錢唐撫句踐之故墟兮弔臺觀之榛荒颺高帆以  
渡海兮揖羣仙於雲鵬凌扶桑而遐矚兮浴赤曦之眇  
眇盼梅梁而太息兮企聖賢於諸馮何三千載之寥寥  
兮大運若是其污隆緊娛遨之足樂兮傷馳驅之勞勩  
扇朱光於炎宇兮安得激清風而來至旋輕輶於汝賓

今將同采乎菟藿翫曾峰於翠雲兮射麋鹿以為樂亂  
曰子何為行兮吳越之鄉兮韶音之鏘鏘兮矯首以望  
虞皇兮邈矣夏禹海茫茫兮哀民生兮曷時而康兮

惜別賦

有序

宋  
陳藻

漁溪諸友卅角相從或相識乍離乍合今歲偶聚向時  
未生或初生者長成而卅角有逾壯齒矣二月始集講  
論未幾槐花將黃次第分散余世事已懶筆耕亦倦日  
嗜啜茶飲酒逍遙行坐締翫溪山之勝耳安能激厲諸



君哉閑撰數辭強名之曰惜別賦

塲屋微名舉世營營有貴於己在人者輕人疑余兮未  
貢余已官而改京買臣行歌咄哉小生爾既朱輪孰與  
原憲終貧兮自得之榮況乎乘堅策肥旌旗擁路於青  
史兮無聲噫天垂月兮山吐雲青草死兮地懷根一枯  
一茂日代乎前皆仁氣之綢繆嘻哉諸君世務紛綸來  
歲之春想無暇留醉翁兮談天地之醇六經諸子百氏  
兮縣妙道之所存苟惟綴緝編類以得失為悲欣雖同

居而白首亦奚由兮愈親

懷別賦

元  
吳師道

余悲古人之不見兮每撫卷而長歎幸斯文之未湮兮  
有作者其猶可觀行四方而歷求兮嗟遇合之良難驅  
余車於宛陵兮忝卑冗之微官際碩師之疾止兮挾文  
采之鵷鸞仰門牆之咫尺兮從几杖之盤桓鼓經笥之  
芳塵兮挹詞海之餘瀾誠內克以自慰兮忘栖栖之鮮  
歡既往造夫承明之廬兮邈睇乎雲端忽幡然其來歸

今踐良期於歲寒方金匱之紬書兮競羣英之彈冠  
清光以奏伎兮銜奇賈於琅玕何翁季之齊志兮追嘯  
歌於考槃塞余抱此幽懷兮憎悌鬱乎肺肝望白雲之  
悠悠兮昧飛雪之漫漫念不可以此留兮返余告乎叢  
蘭惜方密而遽暎兮尚勤勸夫加餐俗滔滔而日靡兮  
慨脩名之孰完時動靜公則然兮夫豈非小子之所安  
雖千里其匪遙兮炯相照於中丹

離人怨長夜賦

以別思方深寒  
宵苦永為韻

唐

王榮

離思難任長宵且深坐感夫君之別誰憐此夜之心念  
雲雨以初分何時促膝俯衾裯而起怨幾度沾襟始其  
歌罷東門袂揮南浦征車去兮塵漸遠匹馬歸兮情自  
苦閒庭已暝對一點之凝釭別酒初醒聞滿簷之寒雨  
且夕也悄悄何長悠悠未央向銀屏而寡趣撫角枕以  
增傷蓋以緬行役兮路千里邈音塵兮天一方我展轉  
以空牀固難成夢君盤桓於旅館宜易為腸由是觸目  
生悲迴身弔影雲積陰而月暗鳥深棲而樹靜凝情漸

久訝古寺之鐘遲會面猶賒奈巖城之漏永於時階滴  
飄冷窻風送寒徒抱分襟之恨全忘秉燭之歡遠林而  
未有烏啼偏嫌耿耿幽壁而徒聞蛩響頻覺漫漫嗟夫  
昔每同袍今成兩地既覩物以遐想復支頤而不寐鄰  
機尚織重增蘇氏之懷詞客猶吟更動江生之思況乎  
燕宋程遠關山道遙怨復怨今斯別長莫長乎此宵使  
人玄髮潛變紅顏暗凋杳嚮晨而若歲嗟達旦以無聊  
且夫名利猶存津梁未絕苟四方之志斯在則五夜之

情徒切然哉吾生既異於匏瓜又安得不傷乎離別

離居賦

元黃潛

慨予後古人而生兮恒潔志以好脩憑祖先之遺業兮  
援往烈之餘休粵總角以授經兮歲行汨其已周獨貿  
貿吾何故兮庶遠悔而為郵攬儒哲以我弼兮懿前志  
之為謀非夫人之察予衷兮孰蹭蹬而見收胡閔勉抱  
茲獨兮曠周旋於窮陬廓私處而莫伍兮愴增思以懷  
愁昔回路之相贈兮竭所獲以交投卒並轡以疾驅兮

入聖域而彌優彼獨何人兮予顧忍恥而蒙羞惟昔者  
之擇從兮極遠討而旁搜衆雜還其既多兮邈異趣之  
交鈎紛詡詡以徵逐兮咸胥顧而勸憂曰予行之不可  
兮矧將勗予以良猷居快悒其誰語兮弦予歌之幽幽  
惘惘慌以顧懷兮耿孤倡而無酬哀下土之坐濁兮駭  
奔飛其呀咻大龜視予以吉卜兮曷去之而遐遊廣輪  
曼曼而靡極兮忽又惑其所由非識路為之先道兮懼  
九折之摧吾輶荒穴豫以狐疑兮悵臨岐而夷猶軫中

情之戀嫪兮思勃鬱而若抽噫遺行之已累兮固吾以  
為贅疣弗瞑眩之是圖兮何厥疾之能瘳堅所秉猶未  
怠兮悼年歲之易邁諒予懷之既騁兮雖坎壈其敢偷  
苟非予之所存兮夫又何求結煩言而招要兮遂矢心  
以綢繆夫有恃以為善兮詎無成而淹留





御定歷代賦彙外集卷八